

陳恭介公文集

陳恭介公文集卷之六

明餘姚心穀陳有年著

吉水南皋鄒元標校正

萬載崑崗張璧同校

從子陳啓孫付梓

冢子陳啓端編輯

序

贈龍潭鍾年丈泉州節推序

今夫世之譚者孰不曰天下事固天下人任哉逮事

及身乃輒為難易所前却腴者瘠者夷者病者劇者
暇者交於前而不能持也趨避萌生所繇營擇甚者
一聞巖棘怔心恟目認認然惧其軋已也皇皇然必得
求而後當視平昔所稱引何如哉癸亥春龍潭鍾子
拜泉州府推官泉瀕海多盜俗號難理比者島夷出
沒波毒閩越無虞歲荐至興化之不守而連城殷血
矣赤子幸脫魚肉或更為島夷地其腥風方未殄也
泉興興比貼危困剝固甚所謂邑邑棘難巧智所深
避莫先焉廼龍潭子則無認認意日求祖識俗故者

相與講悉政要蓋自得拜日即精神毅然為泉民先
憂如此說者謂龍潭子刑官職於禦侮為後易為也
然予聞天下不患寇盜之日張而患法度之日弛
國家懸律令待天下變態甚章章也若法意舒慘必
得其人操縱之故司寇綜其暖姁尉質其平省有臬
府有推舒之則競功慘之則逆阻將謂張弛係天下
非耶何以言易也余又聞巨攘播越必有餘宄忌器
橫集必有煩言今越閩失生之民散而觸羅者冝衆
矣以其觸羅之衆也有意督過之苛小賊誤使迫然

不堪命是為厲人嚆矢也或憐其失生故抵是遂從
寬典并盤逋宿猾一釋之何以已亂亂不已且厚是
自利其太阿而以示人也龍潭子之行太阿握矣性
固長者必不為嚆矢若予知其操縱必善視階厲者
必刑刑無巨視染惡者必宥宥無寡無翫彛無任已
無遷柄曉然與百姓共使百姓曉然皆知其為我率
乂也染惡者知生階厲者知不容於法也心將戚戚
然樂善而悔惡泉俗信多盜獨非人心乎哉夫堤踈
蟻穴而後漂水決之法弛盜滋而後外侮乘之民誠

安矣俗誠善矣即島夷蔽海夫何能為彼將蕭然鼠
遁耳故曰內寃烈於外奸三尺威於五兵得其機不
得其機理亂自信何以易易言也龍潭子與予觀司
寇欽予知其凝然任天下事口不言難易者君今刑
官也予又為司寇屬故於其別也與之言刑事

贈惺字張年丈尹光山序

今天下患北劉於胡南燬於倭此其勢則鉅矣然君
子所隱患不在是患在百姓憔悴而親民者曾不覩也
余南鄙人也不能道天下事往見倭夷毒南邑民有

蒙瘼扶傷得一良有司噢咻之瘼蘇傷起忽忘其毒
者或不幸有司不之恤且從而腹之民卒避走徬逢
封豕改時而亡耳余是以私竊計謂天下事皆宜然
欲使百姓附登天下至理在良有司而已夫百姓若
憔悴勢非得誠篤慈厚長者不能孚輯而誠篤慈厚
長者也率兢兢務實效不矜於名廼百姓終賴之故
曰良有司民之命也頃惺字張子拜河南光山令張
子固誠篤慈厚予知其必能光山顧張子兢兢若不
戢也曰良有司難於是諸同門進者儼然造曰拯溺

利舟救燭索汲豈其坐民於悻空蒿目焉賀君之始
職而以親民也夫政展則愉尼則悌事有廟廊不能
喻諸民而令所一注措不下堂即翕然傾流者賀君
之展也光山北不介胡南不隣倭中原厚土猶然汝
墳之舊桑稼葛越之生也矧又未殘賀君之撫完邑
也昔有觀河洛者依然禹功在焉至喟然而嘆夫光
豈有裔民亦周黎不殄之遺也文王遺風不可覩覩
汝墳得不有悠然曠世之思耶賀君之臨茲土而師仁
政也諸子者拜而賀惺守子輒拜而謝然兢兢若不

戲也曰良有司難良有司難時余未有以賀迺復進
曰賀君之知難也知難則不忽不忽則良世豈無知
辨糴俗強幹絕人動嚶嚶然曰令不足為者及至分
一邑臨百姓或遂恃智營淵恃幹焚絲恣情拂憲以
成其違使百姓囂然無樂生心而彼方驚然以龔黃
為鈍無他易之也君既知厥難不得不勉厥良余於
君有望矣余聞光主厚顧寡積好商賈俗舊稱淳美
頓躁勁尚氣節即有呼易走耳然予南鄙人也莫之
能知也比者南北寇作調集騷然不經矧百出江淮

賦甲天下且告誦甚矣先信寡積通將宴然而已乎
抑不免於騷也今國家禔福中原謚定固無所謂
時者然民不可使窮又尚氣易走之習不可不漸消
也夫富民易俗真良有司事彼謂令不足為者慮不
及此君既難之矣能無兢兢圖哉余聞敬生善肆生
尤君為持此心也即運以誠篤惠以慈厚發紓仁政
撫完展采以為百姓利賴何難余於君重有望矣言
已拜而賀惺宇子亦復拜而謝既其往遂次以為贈
贈斗城凌年失之南安節推序

斗城凌子拜南安郡推官陳有年曰君子學以從政
豈不豫哉徃斗城子盍觀比部政云故事士始第觀
於各省以明習也然無所事事歛趨歛散率日一揖
止耳獨比部耳風紀目情偽自朝至晷以為常斗城
子性沉篤凡巨詰小創伏奸顯愆諸所聽睹畢注臆
歷歷然不置其務實學如此始斗城子暨余共省時
時過余語且戒毋以事未及媮自恕也余甚愧之迨
余謁選復為茲省吏事及矣據一牘輒若闔閭索途
媮前媮益甚今斗城子手三尺法縱操列邑以臆注

者為理即為鑿誤錯岐業已夙講之矣故媮習無功
豫事不蹶斗城子豫矣哉然斗城子且辭余南余亦
學無媮也於其往義不得效面友然刺刺語別私通
舉職中事與君論曰刑之不可廢久矣君今所聽睹甚
具試論今之為刑者豈將廢以微纒決以桁楊鍛以
刀筆礲情比法取文無害而已耶亡其司命教祇有
出於云云之外者耶夫刑忌器也古聖人上以期治
下以革俗使徒礲情比法而可為也則刑差宥別倫
昨叙章按而陳之是矣美咎繇者以德稱汝封者以

心何也余觀天下勢大都北之俗悍而直民率敢為
惡不顧後其訟稱椎埋剽突挺刃相屠過半南之俗
利而多詐以機智揣摩相勝訟多伏陰襲出其輸情
直指者固尠耳江以右固南俗且最健南安與巨洞
沓兼有敢悍氣郡雖小亦不易聽也夫民險健上類
以險健逆之民敢悍上類以敢悍忿之彼鉤鉅擊擊
儒者不道廼其始亦坐忿遂已甚遂過而出此魯取
知其政如楊沸束薪恣無本末是以操術若神民遁
益狡一朝而尸百罪徒令矐矐重足立耳不能易之

慮也。君今理南安，將使險者用情，健者悔禍，敢悍者畏義，君寧無意乎？誠有意，當圖所為，期治革俗者何？繇視險者，健者敢悍者，方將憫其入井，欲振之使出，而遑忿逆之為也。夫天下患不咎繇之德，不患無刑，患不汝封之心，不患無臬。君誠有意，圖所為，期治革俗者，即一念操縱之，皆為良法。又況所聽睹甚具乎？昔周茂叔為南安理，有欲曲法論人死者，茂叔至委手板去，迺其事。竟直推此心，倘不幸而不獲，直將惻惻然若已殺之也。此咎繇廉叔之心也。孟子曰：以友

天下為未足又尚論古之人君今所聽睹甚具出而
從政且與茂叔相對越性沉篤務實學余知君必能
尚友矣余聞習試即其願學者質諸君君以為何如
斗城子曰旨哉敢不敢服亦願子夙夜毋渝以實茲
言也遂相拜而別

贈錢懷白驛宰序

余讀春秋外傳單襄公過賓於陳以候不在疆為蒧
官齊桓會葵丘陳王政亦曰無忘賓旅未嘗不嘆先
王秩官之密而立政之周也我國家疆海寓賓夫

下交達都會軫旋樞集之所率為置驛驛有丞即古
賓候意曩歲余以使事道燕魯歷楚越見負弩者驅
授館者飭簡書不壅旁午皆給以為盛世當如此然
其流蠹宿弊亦且不可勝較何也夫往者之風固淳
矣邑無三遊人無侈觀居則勤植出則裹糧傳舍之
間無事而食者十不得一風會漸流詐偽萌起故有
飾其都從舉其利巧以捷出不意然猶有還忌也傳
舍之間無事而食者十不得三既而懺立景從百詐
繼至或稱權家或假兵檄或暨無賴者為市狐掩狼

脅以與王官公馳若為固然也傳舍之間無事而食者蓋十過半矣且世必有上下之辨而後可定民志故公不給私負不乘器韋藩過洛則故不渝寧獨為財用惜抑有深教也今交逵都會軫旋樞集之所使小人與君子伍決上下之防不之辨何以定民志示天下觀此余所為太息也驛冗丞黻說者謂丞亟導送視徒役畢矣然國制往來詐冒丞得訊察之饗廩應否丞得操約之載在令甲可按也夫分所不得為者欲為者曰侵分所得為而不為者曰曠惟時以冗黻

視丞丞亦以冗微不自立是以朝趨夕避坐使小人
與君子伍若罔聞知曠孰甚焉此余所為太息也吾
邑錢子授荆之潘溪驛為丞將行以余有鄉戚之雅
過辭而乞言余故得以曩所感嘆者具論如此客有
聞而嘆者曰君奚異於丞夫紆青結紫而曠焉者皆
以官為傳舍者也君又奚異於丞余聞之又懷然失
也此其言雖激要未為無見然余於錢子之乞言義
不容舍所得為者而他告云

送小峯李年文令歸安序

歲癸亥山峯李子拜浙之歸安令時 天子軫念民
事咎有司貪且肆使元元未盡遂諭天下廉厥稱否
以聞於是適自輔邑遠及海隅旣閱德輶常者悉論
報如諭吏治盡聿然振勅矣而李子之拜寔際其會
云初李子與余同年又同居比部久所相從論對無
虛日嘗舉歷代史評之至前漢循吏傳撫卷大言以
為三代而下吏治若此者真不可少也然而莫盛於
神爵之間何也余謂世必有願治之君而後有宣力
之臣故綜覈為精關茸爭淬責成為廢中才亦嚶白

非孝宣在上龔黃即良詎能章章若此哉因相與嘆
之既乃見 天子所傳諭李子手誦色矍然變余問
李子矍然變者何曰漢宣三代以下主耳尚能使吏
稱民安為後世誦首今 天子慮天下綦厚將一措
之唐虞之域而一二有司不能仰若至意俯為元元
痼頽使吏治謝漢氏罪不逭夫號而不應鼓而不起
者非人也頃之李子得拜余賀且謂李子勉哉君今
則前言及之矣曩君奮欲乘明時暨德政何其偉也
今既出而際振勅之會躬父母之責萬有一不能視

盟者何以自解於前日之言君必勉哉毋使吏治謝
漢氏矣李子聞余言頷之因謂余越產碩而問俗故
焉廼為之言曰湖東南澤國也其地宜桑稻饒魚蠃
俗尚力作耕饁繰織為生頗務蕪并其賦居天下高
等其民僇弱怯戰鬪其君子則事絃歌誦說先王大
都如此往者海上無事東南完湖民富者稻千畝桑
千樹陂魚千石僮千指庾陳篋羨以其贏供灌輸則
已耳閭閻殷厚即貧者亦易為衣食也故湖號為樂
土比自海難作兩浙驛騷戎需百出皆不領於常賦

當事之營私者或更從而藉手焉省征之府府征之縣縣征之里殘粒寸絲孰非民之膏也以故貧者轉罄富者懸罄嗟因也甚矣通者寇轉入閩浙地稍息有歲稍稔頽積靡未易起冗輸未盡除民直厘厘息耳即不幸寇巨測復有鯨越之警將奚以待之又不幸天灾流行有卒歲之饑將奚以恤之余以為為今先計者必大甦民困而後可言政也甦民困莫大於不擾而其本在無欲夫民益之難滋損之易歠為人上者孰其仇民而歠之哉特其視為財府居為利資是

以前有流離而不見後有呻吟而不聞此無他有所
困也故其本在無欲無欲矣而不得其大體則擾
擾則病夫湖之地利未改也其民力又足為也廼或
催科之不節作息之不時使農者失耕桑者失採富
者不得務保聚貧者不得鬲股肱是民之困自我重
之也故莫大於不擾二者具而民困可甦民困可甦
而後飭武備以起衰修文教以成俗即前所稱漢氏
之良美讓哉夫抒志成允效實而建庸者君子之上
對也蓋天子利元元俾閭閻而忘其困者君子之

所獻最也余於李子厚望矣李子聞予言復領之居
無何李子辭而南諸同曹者皆出祖余坐閱國中事
不與焉廼次前所論對致諸郊曰贈并有請於李子
何以處我也

送陳民秀出守臨江序

代作

陳君民秀余邑人也始民秀含英韞郁以明經起家
余見而重之曰斌斌哉儒矣俄授刑部郎刑部司章
律即又善章律歲癸亥余入為司寇而民秀業出監
江北要囚然曹中徃徃推道以為固明允人也無何

民秀竣事歸扣之通使業甚具旁及躬所擊撫壤習
政宜歷歷底于理比答其在事辭無細大必僣僣清
鞠之鞠必犁然當即麗法者蔑不稱平則非特善章
律也固有烝烝之治焉居頃之而擢為臨江守謁余
以政余舊歷中外嘗觀天下吏治云夫守尊而近民
尊易展近易暨 天子所畀諸連城而從其制也州
邑吏所視政而布施大都委里四民列社之所仰流
泳沫而休戚寄也然而一郡之事惟守繫主諸事總
至則稱劇監司有事下之郡郡承之州邑有事上之

郡郡綜之則稱劇以故為守者大都期會取先簿書
取給曰足吾事矣如其文未嘗不賢守稱也而下未
沐愷惻之澤上未登循良之理即如是守事洵足耶
夫循吏首漢其治自風俗燮惡閭閻疾苦農桑蠲縮
以及溝渠亭障魚鹽樹畜皆目擊掌運畫一而飭舉
之靡所罅漏向使期會簿書足也能歷歷若是不耶
漢初承秦後人不見先王之盛守儒者尼用師律者
轢民以至神爵之後循吏始出群姓藹然有古王政
遺意今民秀誦說先王講於致用之學非委儒抱咫

尺者試為刑官已章章若是茲出而領郡國蒞民庶
即與漢吏方駕論庸宜無難為已且刑官所聽類辜
人也民秀猶盡心焉未嘗事文致而況天子齊民
所受而厝安之者願肯先文具後其實惠已乎余知
臨江之民有賴矣臨江俗淳簡力本知分錢穀易輸
訟無囂險不與楚諸郡埒故其期會簿書約而守者
亦不必以期會簿書自罷以民秀為之得屢厥心目
擊其壤習而掌運其政宜然而澤不下沐理不上登
者非余所聞也余以邑人故識民秀不後已又識民

秀於曹中於其往持以贈之

贈海陬陳君守臨江序

邑陳君官司寇郎五年而補臨江守時余為司寇業
與君譚吏治有言矣比行鄉人送諸郊余與稱祖焉
陳君請曰曩既聞命命之抑諺云庇垣垂塗飭器重
丹願先生有以終教我也余不佞無以益陳君願惟
君子飭行勤樹以為世庸烈其機之當重有二一曰
始仕二曰外補始仕之機殆無論已余嘗觀記時太
夫有居內聲聲末可間染而一出領郡適或愆於其

素者此其故何哉夫守握符魏坐輿臺謠謠衆席噶
喁頤動草靡號令谷應則內曹之體不與也因而充
物艷目侈奉足體可欲可居日以眩易則內曹之習
不與也鉅鉅細細川委塵積伺顰偵間求售詐者捷
出而叢集則內曹之務不與也以故中人之情據其
體或曰令而莫誰何也遂任情以自大狃其習或不
自持或專於衆口曰故事也驟而多務也或不能其
煩審如是安得不舉素執而愆之也易曰正其本萬
事理詩曰惟其有之是以似之夫持術而索治非理

之本也取仁而規轂非有之似也本在誠心為民而
已今天下之瘁久矣親民者將舉赤子而秦越之則
苟而可如蒿目而憂赤子之瘁且誠見其一體也未
有不憮然動惕然省者故有歆視其身而不敢匱民
之事嗟嗟是詎可轂色為耶故曰至誠之道雖之天
下可也君坦夷不飭至遇事輒決裁無所避又善得
下情吏無敢並緣為欺者其素如此今往余誠無以
益君獨念君始從外補萬一不戒則積習之移或為
賢者累不自覺是用舉所覩記牒於中者為君告君

信率誠效素視所善內曹者不愆所謂正而理有而
似也豈直善臨江哉君往矣鄉之人皆於君望之矣
陳君起謝曰先生既終教之所不祇用治而愆是素
者何以見鄉老於是鄉人起而賀曰審垣有址文器
有質司寇氏之云以惠子可與言也遂相與觴陳君
而別

送楊質甫擢守西安序

陝以西形區勝阻控虜環羗蓋古所稱天府也漢之
京兆於今為西安郡郡連州邑以數十所上民事旁

午至悉聽操約且其地都會也省中百事率埤益之
民日難堪或督府有人經畧藩臬大力政大供億又
率即守謀責以集艱鉅視他郡倍而其勞且瑣者若
頭會勾幹蝟合仍生即有主者不可盡置弗問朝夕
走上官祇動息以為常雖公事委填不敢一朝廢也
當此地非得通強有力者守之且曠曠日見其難或
勉一自振無幾何且蕭然罷矣故守者不易為而銓
曹亦不敢易置守歲甲子會西安守缺銓曹謂司寇
郎楊質甫才且舊令華習其地遂疏用質甫守西安

司寇氏聞而嘆曰善哉用人華山截業習登者馳洪
河洶駛習濟者方豈獨其人趨且神哉始乎才成乎
習是輕山徑手輕河流是以難者率易也質甫固才
吏始而筮仕於華也一之日怵怵然二之日井井然
三之日豫豫然而政以成方其時秦土之善敗靡不
辨秦民之休疾靡不悉不謂之習秦不可也茲將使
之奮趨而馳熟操神而方恬胡高不登胡廣不濟故
余謂用質甫者善矣善矣雖然余猶有感焉山人之
登高也怯跬步不能陟則千仞空躋河師之濟廣也

限咫尺不能達則稽天徒涉何者人以彼為必陟其
巔必達其溪也曩質甫去華秦之民蓋望塵而追曰
安得吾父母而終惠之既咨咨戀者久焉今往矣秦
民之引首者曰是故父母吾土者也則又疑然喜矣
夫悲生於愛喜生於仰愛慙者難副仰厚者難奮故
未至民視其下車也既至民視其出號也少頃民視
其膏潤而澤濺也詎惟民然為州若邑者視其所操
約我也為督撫者為藩臬者視其所有鉅而任艱也
若曰是故才者又嘗習是者云爾質甫何以圖稱哉

萬有一不稱何以塞上下之視而自解於跬步之怯
咫尺之限哉昔黃霸領馮翊簿書正卒善京兆王尊
始令槐里繼霸稱能論者違其光大后聞而寔以休
前政質甫往矣毋使二尹顯美於漢是君子以紆才
章習而善用其脩樹也或曰質甫在華時值地震幾
壓乃竟免不十年竟守西安洵如是則天之祐質甫
為秦民亦誠不偶又何所用規云

贈毛石隣臨清經歷序

石隣子函文抱質誦說先王積四十年矣蚤遊邑黌

已復遊南雍卒業焉歷試皆左歲癸亥奮曰日冉冉
往也而尺寸未暨如時何且君子貴自植植矣雖三
命其將有庸如其不植即都華躡榮亦何以稱多也
故乘時效素寸或見長臨岐自失寔用亡羊吾將仕
矣於是謁選為臨清經衛經衛散秩鮮事無以展石
隣子或謂石隣子必不豫也間心穀子曰君亦聞治氏之劍乎九鑄
石隣子第驟然咲心穀子曰君亦聞治氏之劍乎九鑄
之金百鍊之德發以越砥淬以寒流可以剗巨劃堅
揮斥群眾闕塵匣而示諸人見者未之能奇也試取

而懸之廊落之所委之霜蓬之荆詎足當劍用哉而
亦不至於弊劍之精及觀其熒利而異之廼以巨且
堅者而從其制故神全而用不衰向使役屠肆異礦
穴剗斲交施不為利折豈不稱利器哉然而其神損
矣君熟權之毋以經衛為少是霜蓬試君者石隣子
迥然曰我鉛質也子寔慕我敢礪鈍以需居頃之石
隣子且行矣過心穀子而語別心穀子曰君亦聞良
劍之自養乎夫剗擊不避鱗者屠人之刀也斲礎不
避礫者礦人之錐也歛晶儲銍隨試而見神者君子

之劍也彼且廓落而懸之因與之戢銳於廓落彼且
霜蓬而試之因與之遊刃於霜蓬不與鏃適不與礫
爭而後剽巨劃堅之能事可跂矣非惟良劍良士亦
然君今官臨清臨清東齊都會矧當午道輶櫓之所
比集泉賄之所藪萃歌姝冶子之所駢遊其靡曼不
可渝若鏃然其奇哀總至積不可開若礫然是以饗
士甘心中人奪志居使之然也君幸處懽投閒視云
云不相望又老於濟鍊為巨堅器其不奪志而甘心
也較然矣抑老氏有之不見可欲使心不亂君洵閒

且憺詎能蒙目充耳迹云云者而塊立耶夫善自養者約心以馭耳目不善養者從耳目以役心向使寂心極於所居而豔心生於所接余想其忘自養也昔子夏被服聖道最稱篤信猶云入聞夫子之道而樂出見紛華盛麗而悅二者心戰未能自決嘻深乎烈哉耳目之足以移人如此夫以子夏爾爾下焉者又奚宜戰想君之或顙之也余是以云石隣子肅然曰我質也鉛然不敢忘也子况振我矢不謖遂語心穀子書之手劍與言驟然望臨清去僉以是知石隣子

泉無不豫也石隣毛氏姚甲族以詩書起家者相望
心穀子曰石隣子雖不偶必能無潰其家聲云

贈胡南橋武平尉序

南橋胡君予鄉戚也初命為武平尉武平通潮梅邇
贛吉俗利魚鹽狃於閩亂自頃鯨海鼓濤奸憑以張
重以潢池之警比壤相軋鴟夷萌生兵氛匝還征役
科調溢於故事大都閩邑比然故今之謁選者譚及
閩邑輒認認然惛息也廼胡君獨奮曰茲非烈士勉
植之所哉懸弧之始志不在圭竇驅車之日行不避

羊腸夫使擇便媮恬苟自封置則人之稱斯役奚事也予聞而嘉之曰壯哉胡君之言方時之患患在人不自立而冗職尤甚何也粵自限途之制行士有起家他途此心已先隳廢矣及授之以艱棘地也則隳者且慄廢者且危隳志廢功職故日圯雖然此非制之過也不能自立者之過也往島夷發難於吳越國家懸重格獎奇勞有能激昂程力者輒破常調擢任之亦何途之限哉劍有剗割之用則雖出於泥沙將珍其匣不然必其為利者無以加於凡劍也馬

致遠之用則雖起于下乘將異其樞不然必其為馳
者無以加於凡馬也舍自立而曰途也途也亦良負
矣胡君余邑之伯族族固濱海目稔鯨海之波嘗與
宗人團結障島夷為一方重若征役科調之苦且躬
歷之視民生困瘼較然所哲也以是奮自勉植彈壓
武邑之上予知其當有用哉胡君往矣公國家方重
用人胡君勉矣毋墮毋廢毋與凡劍凡馬例以無負
今日壯心斯烈士之表也於其行遂書以為贈

贈邵環渠簿太湖序

始環渠邵君承例入貲授僕省司藏書考矣論資太湖縣簿君於予內姻也瀕行過余曰何以贈我余曰君之簿太湖常若為僕司可矣君未達余曰道一而已君子握道以馭職心樞掌運而天下之政成謗夫索之職而道漓是以動括而績罔程也余觀仲尼大聖嘗為委吏矣則良委吏為粟田矣則良粟田大聖豈委吏粟田者哉道固不以崇卑二也漢卜式以入貲進牧羊而羊善群既以其術論政即政鑿鑿然可行也夫式不得為知道迺其事有牛羊茁長之意焉

不可以其人而少之也君今司僕藏僕政於國事重
且出納殷君為之裕如也上不以乾沒聞下不以掊
尅病即謂之會計當誰曰不可夫式於道詎萬有一
偶獲緒焉亦是善政觀君所表見竟君所操約以善
會計者施之太湖亦大聖之道之緒也於簿何有君
曰言不可益乎曰道一而已知道以學學莫深於所
薰陶君故敏人也君之家又世以學顯晨絃夕歌諷
聖習賢自君童時已薰陶者漸矣嚴庭穴湖公駁歷
中外十餘年為時循守君又侍聞德言益祖識政務

自古稱守若令者必曰循簿贊令者也獨守道乎哉
君伯兄淡山君魁省薦蜚華儲實方以天下為已任
今又適在茲所日與君居君試以予言質之當知言
之無二道也語曰魯無君子者斯焉取斯彼卜式氏
謗謗不學者不得為知道余故知君不屑屢矣庸書
以俟報政

贈溧水簿劉繼崖獎序

繼崖劉君余不知其何如人然知其通才治吏也君
宦蹟去余千里許余知之蓋自家仲氏云始君簿溧

原缺

里贖舉得而徹聞之海隅日出通於階序治則大治
余睹古國家所為制不曰近古哉然而實駸駸渝矣
夫呼家人與之語雖至駸歷歷焉猥指傳舍而詰諸
過賓即辨智蔑有悉也今之計牒則大都傳舍籍也
計之日旅伏彤墀退抱牒謁司功所司功疏負殿者
以聞一旦報可則有渙然散耳魯不獲接咫尺之顏
無論奏對遂令治古休風挈然哉可知已今

天子深鏡厥理當甲戌之計擊天下殆狀躬御臨閱
勞寵最速已復躡掌治者意脩久任故事尤重守令

守令即異等不驟遷要以廣吏治利民儆俗甚感也
越三年計再及矣天下之奉職行者纍纍多申成故
吏而吾郡則彭侯侯為人廉敏其蒞郡尚治辦而不
為鉤鉅事至霆炤劔騁意為立決老胥旁立睨侯斷
搯手齧舌相戒無敢舞故智所部邑錢穀獄辭若諸
所廢置全集待令未嘗幾微壅底云猶然夙考夕庀
不一日傳舍其民以求稱 天子意旨侯今往而述
所職 天子課侯治無不中程者視甲戌有加狀必
有以勞寵侯且益躡掌治者言曰此久任徵也余伏

在草野無能知國論然竊意之往 天子居然諒闇
之中已注意屬天下治矧茲揔攬益親倘遂嘉虞凋
而上進諸大夫於廷問治狀所繇致若天下謠俗便
宜民胡以利俗胡以燬侯則必有對矣夫紹興雖於
寓內為海隅亦吳越之間一重郡也郡故多童叟逢之
士嫻於詩書易與興理其民生長硯陔食勞無
所牟大利然士俗顓靡民俗近謫山邑海澳之俗曠
城郭都市之俗治日者島夷之難殘傷不啻半笑倍
賦緣而起不可塞也故彫廬左苦賦之信也棄鉤鉏

而赴戎募或逐付二故野侵尋有奧阜興阜生彫滋
甚矣彫不能無生亡賴亡賴者薄作業而矜於驚悍
故椎埋寔繁即諸邑莠虺其大較如此矣疾在事次
蒿目而察民俗之故夙夕慮此至熟也慮之治時而
遺之 天子之廷侯必不然昔龔渤海之對治也壹
歸之聖主無他敵彼漢帝所問者功耳臣義不得自
伐若夫采風誅政追王者回聰之美又何讓焉侯既
趣駕諸邑校文學君徵余言為贈余不佞知侯之德
吾郡也深且有意其為之所也輒因諸君致其意夫

渤海受對於文學余言也不顯或各有當云

贈次岩陳侯遷南刑部郎序

陳侯之為尚書刑部郎入南中也蓋用治行高第遷云始
天子脩久任之令其明年侯寔來知吾姚事凡再上
計有狀再還邑比遷蓋七閱歲矣不佞伏在田里間
從邑人士稱說侯輒私為嘆之焉夫自古課吏治曷
嘗不尚久任謂服習諳俗狎為元元計便利有固心
也然而不佞以為不視其制視其人且也人之情趨
而入于善寧非一日矣故有特願顯知厯瑕暴堅無

端而造可喜以求蓋衆以罔上譽猶未也旦日秦一檄不深惟其本末而屑屑焉爭於期會見謂奉公猶未也卑疵熾趨不左司顏而右偵息幸而介寵沾沾也如其不獲怵焉病徃械之尚拙屏營焉而倍以王及夫時日漸久前鼓則俛得而却慮則未知所稅駕其日幾除日若饑者之望歲而忍弗能俟也媮視蔭而不事事若三鼓餘氣蕭然偃戈而息也中熱而累於懟若叔世處女不習先王筭字之故而怨愆期也坐使首尾衡決名實不相應即如是元元豈有賴焉

此非制失也其人非也陳侯蒞吾姚閔七歲有一於
此不邑人士則共睹之矣侯才洵美尤務為長厚不
苛小不撓鮮事至即叩囊而集乎常若不得已也者
曰無為鳴鏑也里胥雖受事於公常退而食在閭閻
曰勿使奔命也視邑既深邑情偽少所瘼伏然終不
欲以察示明劄示廉也曰柰何以百姓市吾轂事尊
官無論他械即檄下必徐而後動也或遂格不應曰
吾不以市吾轂矧市吾寵故人知之不氣盈不知不
意缺始下車不急張積不調不就損卒之可安止獲

治行徹聞而尚書郎命下蓋閱七歲如一也故實家
誠欲脩久任利元元得如陳侯者其可也不佞輒從
邑人士私嘆之如此而或則謂官家懸爵待久次以
侯之賢不當為諫議若御史耶而郎司寇氏又署之
南且司寇氏分曹而聽曹簡者率累日不能具一獄
抱牘尚書前語受成竣耳曹不煩老吏一游刃力僕
得無少之不也詩云上帝臨汝無貳爾心陳侯無貳
矣七歲一邑泊然不是少而少尚書郎哉夫尚書郎
領國典六之一又非可少者艷諫議若御史威重而

少郎官或錙銖衡南北善宦者則然豈所稱陳侯也
且司寇卽卽簡乎哉上帝臨之矣如以武健則歲報
數百千章若不足為不然而將嚴天之威也古君子
服念要囚至于旬時卽累日而具一獄猶之乎速也
不佞往從司寇卽後見諸卽日盱旅退騎而之同舍
所彈碁六博舉白引滿雜然相驩其不者鄉意古文
詞為名高耳卽有講詰挈令或更譁之安用此城旦
書為時肅皇帝在位久讞必親決每一詔獄下大司
寇廩廩顧吏事卽參擬以上得可事始敢解頰養精

奉督過彷徨不啻病悸廼諸郎猶然爾爾此其故坐
以郎事為少不嚴上帝遂以成風不佞之從事新蓋
從風靡也然至今追念之未嘗不悔且訟云陳侯士
歲於邑手所傳爰書報讞監司御史臺不魁稱老吏
於以郎司寇誠無難雖然陳侯無貳矣夫惟無貳可
以對上帝吾知侯之不少郎事也今 天子好生慎
罰間者愍焉董諭理官要勿以微命傷天地德侯往
矣異日者稱兢兢奉德意數千里如在輦下也斯之
為淑問不多矣哉於是邑博士何君率諸生謂不佞

雅知侯徵言以贈不佞不獲辭則為次所嘗論云爾
侯善經術興學勸士有禮不具論而博士君又言比
司寇郎久次得不次晉叅藩政夫豈惟叅藩政先朝
故嘗丞廷尉矣然不佞所願為侯重在此不在彼也
賀馬侯考績膺薦序

馬侯蒞姚之三載屬當考績會鹽官直指使者報命
則舉侯治行高等云頃之侯隨牒待事監司監司課
侯績中程且賢上撫按撫按交最侯績䟽聞而令侯
還蒞邑事制也於是邑卿大夫士僉謂侯惠治我久

績是用成圖所稱質者屬不佞擇言焉不佞歸田間
新雖憤不與聞政乎間與鄉三老語稔嘗為志之云
侯禔身謹於纖介苞苴逆自避毋敢以私嘗者慎事
自重動必湛思而後發不以咄嗟兢期會不以桁楊
迫傳人於辜值事之殷也戴星而治不意躁不色罷
不已於事不竣也又曰徃者歲之不易侯寔蒿目為
遺黎請命以徵官家蠲卹吾民不忘楮中其敢忘大
惠不佞聞而竦然起肅然聽也由前則服官之則也
由後則拯菑之仁也不詭為高高乃成不詭為最最

乃登其聲在剡其目在牘其實在瀕海下邑而其庸
歷歷哉徹楓宸矣則馬侯洵賢矣哉然而不佞猶以為
此未足重侯蓋咎繇之謨虞也曰彰厥有常夫既以
彰彰載采而尤要諸常萬世官人者必此其準已
皇朝監古馭吏觀風有節司功有令高之下之殿之
最之豈旦夕是謀亦惟常德是求以為國久長用有
如始然而終不然將使高下渝等而殿最渝績何不
常甚焉不佞詎敢謂世有若人亦詎敢謂世無若人
嘗試觀之其人大抵務華黜實上之挾長侈厲顯出

自憙一以刺風指一以獵名譽其於清慈慎勤即非
其質哉亦往往以賈市下馬者卑卑無奇縱不勝得
失之患矯未猝肆而其用心不過習令巧工為調續
庶幾顯者游揚乎云爾方其幸而獲售各意得也然
君子不俟再見而已逆睹其必渝矣馬侯有一於是
乎吾見其訥訥乎若不出口也吾見其眊眊乎不染
於態也吾見其闇乎不的的而急人知也吾見其凝
乎不沾沾前認認而却也吾見其淡乎不為交也撫
按之最循之鹽官侯者之舉鹽官侯者之舉循之鉅

三老之言侯蓋質有之者也質有之故不渝不渝故
近於常想哉以往心之日融也識之日廓也德之日
新也業之日劭也咎繇所謂宣與嚴者也是在侯為
之而已道衰文弊淪者滋起而或遂槩疑天下士若
謂巡察考課至是而不足馭吏君子蓋三嘆焉不佞
有以不侯之必不為彼也是則是重也異日進而名世
識者倘遡厥權輿自蒞姚始而因以明余言之不僭
乎尚求士於質毋以其華可笑遂持諭諸鄉大夫士
書以為疾賀

賀楊侯考績榮封序

余世家句餘然出門不之百武梁衣帶水而西即虞
壇矣頃歸田之次年而楊侯滿三載最得封父如侯
官母孺人楊侯者虞侯也於是虞薦紳大夫相率謁
侯賀而屬余叙夫虞侯則猶余侯也敢以耄不佞辭
余惟考績尚矣皇虞以九載為斷蓋其覈也漢重循
吏即亡論久邇第以賢著者輒增秩賜金璽書嘉寵
而褒德三令侯矣顧其時未聞貤榮及先者厥後章
章漸設、國朝令甲猶祖虞制初最之有貤榮也自

正統始若曰懸此異數以待異等云君子安得無深
念也夫今之稱親民必曰令然古建侯不世私其土
乎慶讓之興揭若日月猶不能使人盡為德也而況
東西南北之人甫稅經生業筮仕而臨非吾土循吏
之不數數其勢固然楊侯蜀產也去越亡慮數十百
舍一旦為政指掌指謠俗所宜若少長其地者錢穀
獄訟紛集總至具得倫要莫能欺若習為吏者然且
竦然其矜於廉也夷然其不為撓辭也謚然其與士
若氓宜也蓋侯西上計明堂每還治而頌聲輒日新

滋益起云先是虞人無奇己丑庚寅間余難言之矣
聞者至以為巖邑賴郡丞張大夫式蠲濯之通國驩甚
惟恐一日遷去比大夫還無何而侯惠然來矣迨於今
士若氓寔父母侯而津津於大父母之承恩亟欲得
一言志喜也豈繫易地人願自致何如爾余聞封君蓋
諸生高第屢射策不偶會司功令當封曰吾志有所
授矣遂拜命夫人情親孰不欲成其子子孰不欲成
其親本之則先自成封君業以義方著其在今日則
千里之發軔也余意侯拜使簪冠服上諸君君且曰

士君子取不徒榮耳而翁無以為報以而為報而最
哉與而以而翁成達者父孰與以而翁成令德者父
也侯夙嫺封君之訓不難一出而有耀於親庭將來
何可量焉惟是美之貴持也脩豎之未渠央也繼自
今兢兢不諼勤宣令德以永終譽用稱報
天子之寵命寵命且荐至無溢詞封君若孺人且曰
我有子善承我志斯之謂以道自成且交相成者也
天子修皇虞以來故事用名實衡天下而天下之為
臣若為臣親者真能以道自成且交相成而吏治

猶然骯骯世運猶然不昌明熙亮者非余所聞已余
耄不佞敬因諸薦紳大夫効諸楊侯者如此侯賢故
深與望合徵拜侯自有之無俟耄不佞贅矣

同年錄序

代作

嘉靖甲子余承命按山西既秋試舉諸士業錄而上
之朝矣已諸士復以故事為齒錄繹好誼焉謂余其
何言之迪以嘉惠之余不佞且有一日之雅迺登進
語曰子諸士皆晉之良也茲者濟濟哉裒然集矣矧
又同年舉義同而孚情同而諦其彙為茲錄固宜然

有道焉昔孔子之論士曰切切惓惓怡怡如也朋友
切切惓惓兄弟怡怡子諸士以義則朋友也以情則
兄弟也亦知二者所為相用乎夫兄弟有善不以責
然而見一善未嘗不津津喜也豈徒喜之又從而掖
之有不善不以厲然而見一不善未嘗不慙然深憂
也豈徒憂之又從流涕而道之則豈無故其情至者
其義固殷也今有兄弟焉入相示以德出相將以燬
黷先夕後率為君子則世必謂之良矣又有兄弟焉
宗慝抑頌慙更以入于非而日不及義則世必謂之

悖矣夫天下無越情之義亦無盤義之情二者相用
之通蓋如此子諸士誦說孔子且哀然集無俟余言
然余尤願子諸士求諸心毋求諸錄而後誠見其所
為相用也余聞太山有松莧絲覆之蓬如也茯苓寤
然抱根焉仰在十仞之上俯在重土之下而精未始
不通此豈有形肖為之屬哉楚南有善工者鑿珠為
龍麗之以膠累累然相比懸諸九衢之上觀者信以
為一體也無何恒風搖之驟雨液之貫絕膠解珠委
地向之所視為一體者霍然失矣今子諸士一旦寢

然集以情義相附麗其心耶則菟絲之於苓也其錄
耶則貫珠之為龍也余以是有求心之說焉夫切瑳
偲偲怡怡如者固非聲音笑貌所能為也諸士復進
曰然則錄可已乎曰惡可已也觀在原者與患於兄
弟聞嚶鳴者發槩於友生則茲錄也所以維情而勸
義者不為無助又惡可以已哉

正德戊辰年家會錄序

代孫廣川作

年家會錄者正德戊辰進士凡子姓之會於京者也
戊辰距今且五紀矣其始為會自嘉靖距今亦且

紀一紀之間萍合雲變又至不可勝原而是意俱然
在間者情緣勢格暫一輟不講總之盟寒誼不寒也
蓋余之與於會者凡再焉而為嘉靖壬戌余承乏司
寇拜命至先是固始許君古黃劉守金吾錫山茹君
補京校弟子皆居輦下而古灤吳君武定翟君秦安
胡君高陵呂君清苑王君崖海鍾君宜都吳君懷安
詹君姑蘓吳君吉水毛君以京署至南海王君宿松
許君應州李君涪川夏君以歲薦至泰和歐君蘭谿
君以任子至臨海毛君以游國學至得二十一人

復相與尋曩日之盟彙為年家錄系以世裔列以錄
第本始舉末章章悉也錄成僉謂余宜序序曰余聞
諸先大夫戊辰第故多碩公名卿而少宗伯呂公以
理學表天下上接閩閩忠節許公身徇國難奪逆席
晁英毅在宇宙若兩公者尤其最烈者云今西公裔
或勒之勲銘或紹其學術矣而諸年家者並嗣續前
徽後先光一時胥會余得相從繹夙好以朝夕式
燕謀厥遐緒可不謂厚幸且至難哉國朝以甲第
羅天下士其始固東西南北人也以東西南北人一

旦交臂而集之尋且交臂而失之又運以歷紀限以
曠世為子若孫者或未必其皆似也即似矣未必其
皆際于時也即際矣未必無陵谷之變參辰之隔也
數者有一焉即欲相從繹夙好以朝夕式燕謀厥遐
緒有不可得以故名年家會者會若搏沙渙若解凍
豈誠其心則然抑亦格於勢也迺余暨諸君子尋所
謂好盟者越二紀不卒厝諸寒暫輟暫振可不謂厚
幸且至難哉然余不佞竊有感焉自古國家基隆
必有世臣故族丕揚休盛而世臣故族其所食德類

昨也亦必象賢續緒有嘉功以貞報茲國家用能
章輔豐彞而附之以令聞余今幸與諸君子徵祖考
之福世拜寵章身都卿士之位可謂衣渥遇沐芳澤
矣夫易侈而難稱者遇也易匱而難戢者澤也入有
匱思命曰忝出有侈懷命曰負繫二者余重感焉願
與諸君子乘茲良會交相敦勗以畢激昂之私願堅
對揚之鴻猷庸稱遂祖考志載厥家聲為茲會重俾
他日展錄而哆頌者曰碩公名卿之貽若是諸君子
所荷碩公名卿者若是詎不為忠孝之薦耶子之鑒

與故曰元凱濟美申呂顯融蓋言世也斯錄年家會
者義也

壽少司徒南岷王老先生六秩序

南岷王公者蜀人也先是以少司徒憂居而其子主
事君方起家壬戌進士以使觀會公且即吉與處之
中詡詡然樂也是冬天子用朝議曰少司徒賢且
仍以少司徒兼中丞督撫江淮既拜命主事君侍以
如徐公命主事君北遂身至淮視事而主事君謁選
得比部居京云淮南北中國賦多出其南漕輸者

此悉聽成置加以彈壓寇攘拊措疲瘠衆務繼至皆
稱鉅艱公犁然總之漕無滯艘境無駭徒良恃宥戢
千里寧宴當其時公六十壽矣百所運量操約雖譚
笑就理然無一不厯精慮不祇長策也主事君念公
以國計故勤又念身遠弗獲朝夕時時南嚮望公迨
公所誕日則焚香南嚮上壽且致遐祝諸與主事君
同官者聞之相率造主事君所贊祝而其同年陳有
年與焉申詞曰夫南岷公者詎不謂國之壽考哉年
嘗聞尊生者說大都尚希微崇悵漠韜光闕神以聖

大用為士苴而不一試曰是純氣之守也至人之
也彼其言誠曲然論者尚或道之以為干越貴桺
福散終年云今觀公誦聖服賢以奮為世用蓋嘗抗
疏文陛還軫方輿矣指權貴不為却碩當忤屈不為
磷泐起而駁於盤錯不為稱勞進而躋於通顯不為
便逸昭昭乎若柄利錡而操割也聳聳乎若挺百尋
之幹而昂霄棟國也非有闔於希微之谷非有耽於
悵漠之都而閱政三紀行年六十光越神遂方皇四
周順之則精慮出籌之則長策舉此其壽可幾

耶夫壽天所厚君子也天畀君子厚君子亦不以
厚自嗇是故其穀慶厚於家家之人祝曰庶幾壽與
其豐烈厚於朝朝之人祝曰庶幾壽與其美利甘澤
厚於野野之人祝曰庶幾壽與是故德基厚集而天
人交劭用能鍾基趾以嘏元身身不云浮福而人亦
不云侈言今公壽矣壽且名世也矧又有主事君主
事君所壽公甚至不徒以祝尚矣徐沛以南維揚以
北于于然望空稱祝者何限士大夫無問識不識聞
公壽者胥曰國有造德則國重厥有無彊休翕翕乎

非吾儕獨云也大哉壽可知已故曰壽之大以厚天下其細者以畱其身彼尊生者流即其說誠足徼不老去大君子之壽邈邈矣年不佞時從主事君得公盛媿甚具不種種著著景祝之驟如此

壽徐聯峯六十序

禮言之父母在恒言不稱老夫為人父母孰不欲老其子哉始生亟亟然眠之惟恐其不長也既長惟恐其不老也微獨是又惟恐已之不與見而享之也當是時假而有告者曰是必長也老也翁若姬且見而

享之也其為愷樂驩詡當何如者然直告者云云爾
惟恐其未信也猶然如此一旦舉所愷樂驩詡惟恐
未信者而穰穰躬有之吾意為之子者日稱老於牀
前而籍是以上壽適以快其望且益之和胡為其不
可也嘻是人子之情也孝子事親其顙神慮役視聽
而從事於無方也賸賸者弗及營也其動溫清而晨
且昏也其謹扶抑治滄瀘以迨奉槃盞簞和灰紉箴
之䟽且勞無不親也其唯且投業而趨也罷者弗任
也其自養則寒不襲瘡不搔在侍不敢欠伸而敦牟

卮匱不終用也有待以扶衰者弗堪安也彼且安焉而任焉營焉劬劬焉慙慙焉不知老之將至而又何言乎故曰是人子之情也然或安焉而衰不能無待也任焉營焉而繼以罷也賸賸且及之也天之所為君子當如之何人生少之必老如晝夜然而君子持不忍言老之情以處夫非所能為之勢則其情容不能必遂夫少而老天行也難老者天所以假君子也君子所能為者既畢自效矣而非所能為者天又假以難老之錫詎惟父母愷樂而驩誦之吾意為子者

日稱老於膝前而藉是以上壽亦適以快吾思而廣孝也胡為其不可也吾邑縣峯徐公當老傳之歲而母碩人歸然北堂壽蓋逾耄往矣公性孝啓處不別與寢服役不假卑從養無細大躬自承執未嘗以老為辭而其志意足先耳目足遊臍革足以安節勛力足以為禮渥如也矯如也豈天之所假以遂孝子之情而公之所壽母與夫所自壽者實交相待與傳稱楚菜行年七十舞綵弄雛為嬰兒娛好事者至爭繪之而毛櫟潘輿世亦獎艷為譚美然菜子蓬亂逃世

高宮簞席拾粒續羽卽為娛者固足而為養者未具
毛為祿仕追親曾幾何時潘之色養樂矣而蚤歲已
有二毛之嘆不知其待以樂老得無憊不也公起家
省進士秩大夫敭濟粵歷昆湖暨聲博取精厚晚謝
仕檄猶追親存養能愜其娛老能暢其樂一堂化日
祥顏瞻映則三氏者宜不能望矧茲屬良辰啓壽域
玉帛交於門鼓篳和於庭脯醴肆於席融融哉可觀
已食舉而效諸公公不有效諸宜人于以益宜人之
和而廣公之孝彼毛無論已律之二氏其為與綵不

亦多乎當是時公即不言老能已乎能已乎是歲十月
日屈公初度懿親游識諸以其日集者各有歌
誦余伯氏之息公冢婦也義當從輿人後而撫琴未
能成聲廼稱前所云云感於余衷者漫論如此夫余
何知能言君子之樂竊念玆雋日羞飫者御而忽焉
失壺飡者望之而心動廣樂日奏豫者習而寐焉遺
寡缶者聽之而神搖余生後公三十年而前惓惓然
莫之追矣今而後知公壽也余今而後知公之壽之
樂也若夫敷藻鴻懿彥飾福履余何知必有能言之

者

壽越湖邵先生八十序

余未弱冠雅遊外家邵公所有比部白竹公往與先
大夫提衡起南宮當是時皤皤老矣時進余小子左
右款款也而公之季越湖公亦用是時相習不踈遜
云間又從外家長者聞西公尊人菊莊翁壽蓋軼九
十不啻即邵稱貴鉅族至追數高年未嘗不首言翁
尊訓之已而白竹公年彌高視翁則不啻埒焉始余
習越湖公公春秋尚鼎盛迄今三十年而公已致二

千石事家居會余亦家居益往來習公公雖龐然而
年高哉視聽不改舍輿而徒不需損物爽攝衣興事
至酬策不告罷客上謁當閔無距者拜起矯捷更僕
語不欠伸食客在坐出巨羅引滿相命不辭不勝祝
餉不先祝顛不後一切輔衰諸具屏不畜其壯乃爾
爾見者謂公之壽視尊人若伯氏猶近哉其言之也
夫高年之不數數即皇王春熙之世猶然以為上社
矧哉叔世以還譬之履霜圭畧駸縮藉令里獲一耄
是駢肩而離立也鄉覲一期是比閭而狎處也廼公

家父子昆弟仍多遐壽若握券相嬾斯不已踴越奇景乎
哉公為人質直而處厚坦然易知若風生雷動倏焉
恬霽廓若無物以是終日應而神不滑宜壽一公初
命而刺史晉而尚書郎又晉而二千石其勞在起部
其惠在江之北閩之區退而食其報不內怨也宜壽
二子姓斌斌出而有列者為饒陽令為太湖簿為直
指使者其脩業而竢時者采艾也公頽而頽之厥惟
通已宜壽三往菊莊翁閣然葆其真以老白竹公登
運蹇謝事畚於遇而亨於年公總茲三懿非徒載其

家券已也又引之而溢大即謂春熙上祉獨在公家
庭序中非即天寔篤之矣日者直指君以報使便歸
覲當公大耋先一歲之冬弛駕不亟行公揣其意願
謂直指君爾毋需爾王家之使也毋寧使人謂爾爾
實能子而謂爾以我監王事乎直指君祇公命則以
獻歲上壽賦回牡之二章而行君方有大名交臂多
天下士聞公壽顙走使脩詞纒纒然屬也其姻家則
期以公覽揆之辰相率壽公公曰老夫不佞賴天之
福藉父昆之慶以有今日不足以當辱敢辭客曰禮

也公又曰老夫不佞賴天之福席父昆之慶以有今日惴惴無以答大貺敢怵然當客之辱敢固辭客又曰禮也敢固以請乃顧諸子姓肅客入禮成而退書不云乎滿招損謙受益君子又以知公之壽且日益也陳季子曰余壽公蓋從伯子後云仲子時留滯衡陽則命子科也與將事伯子謂公姻兄也仲子之息實儼公子而余也夙習公是以得受伯子意具論公世頗鑿又不為窵言若夫侈頌飾侑公方過自冲挹不敢為御者贅疣矣

贈陳西巖七十序

隆慶庚午之歲西岩陳公年七十矣維時日躔降娄
風應明庶桐華始茁蓂莢九敷綠髮星眸永矢樂山
之素瀟觴瑤什訢當降嶽之辰物華將巖色同春人
瑞與天時交茂於是有賓曰龍村陳氏者公姻家也
即越湖主人而謀曰蓋聞禮緣敬生尊其齒則容肅
情以親洽媚其人則祝興茲西岩公壽既應於古者
尊媚之經矣而余斬然禮方就壞言且不文無以講
容無以效祝將徼君以借頌之義煩君以鋪藻之章

君其惠我乎主人曰唯唯余不佞無能知西岩公往
聞佳山之奧嵯巖之區代產龐鴻家多長老譚空者
以為仙靈所都崇槁者以為隱淪所窟論賦者以為
堪輿所厚主養者以為泉壤所滋然而詡幻之見既
不足言執一之評難與盡理廼西岩公固所稱佳山
嵯巖人也若其以詩書為瓊嶽以冠珮為喬峰覽陟
賢閨翱翔郡幕綰綬阡江之側驅車辰沅之陳固已
頻領歸岑仰磨則劣既而鑒太行之摧輶陋終南之
捷徑收蹤脩道懸輪故山信美岩崖乃眷西顧依微

林麓式稱幽盟於焉咲歌於焉偃息挹夕陽之蒼翠
武接天台愜晚節之棲遲精潛地睇故得駐景冲遊
凝神嶽立良不偶矣夫其誦說先王非蓬島之空筌
也觀光上國非商顏之槁節也挺立之賦林林而山
居者不與也安土之養混混而谷飲者不與也然則
此之為壽固非云云所得窺者耶而公之世復有二
子蜚雄諸孫競秀若重巒層巒垓結有因若玉笋碧
簪峙構相属行將乘時布氣鎮寓于雲地軸千尋共
識崔嵬之派陵阿石里具推瀝逸之宗則異時所用

以壽公者繹繹乎繩繩乎未有涯也主人之言未竟
賓翼然作曰旨哉乎斯言詮壽域之淵源依南山之
比興余雖斬然不獲從慶者末席幾可藉是為公壽
矣主人唯唯遂書以致諸公而係之以詩詩曰相彼
岩兮有蠹其巔矯矯君子亶不騫亶不騫具曰巔兮
相彼岩兮有簇其嶧秩秩君子亶無數亶無數具曰
嶧兮有岩有岩天則作之君子壽考何以樂之我酒
孔時薄言酌之有岩有岩人則企之君子壽考何以
介之我歌孔揚薄言媚之

壽陳西岩八十序

不佞仲兄有子曰啓种冠龍朱君甥也朱君外舅為
西岩陳翁种始受館將承贊謂翁于里第而會翁大
耄之年遂屆初辰以往與稱觴焉時仲兄倅衡陽書
還授簡於不佞曰以余之靡暇种且莫之藉手季子
尚謀所為脩者夫不佞則烏能言憶翁徃七十仲兄
徵言邵大夫而不佞從旁贊一詞請以巖壽大夫過
聽而著之篇翁今益十年高矣渥而丹矯舉而強飯
猶然徃也二丈夫子若孫郁哉烝烝乎益有殷諸生

間朱君則偕計吏而上庭序內外靡所不愉快視往
者有加詩不云乎如南山之壽又云卽彼南山維石
巖々今夫盈而之於虛也蔚赫而之於沆寥也物皆
是也植善零動善病百為善礪惟岩也異驟而瞻之
見以為轟然終老而習視之見以為固然且而環琦
之所藏也豫章三秀之所生也雲雨之所蒸而出也
見以為龐然且鬱然也故巖之為象壽象也不佞慵
未獲承眉宇間嘗遊四明一望翁第蓋綰四明口云
四明彌入彌奧饒奇岩而翁所居故多良剛易圓傍

舍山別而陀乃翁獨取岩自命將翁之心固有當於
岩者否耶始翁起家領郡幕旋已棄歸優游岩石葆
素樹惇迄躋予今壽則翁所當於岩者殆深也異日
進而耄而期岩石無恙主人亦無恙庭序之行翁餘
者且為瓌琦為豫章三秀為雲雨乎哉祝者將日至
豈惟不佞雖然不佞之言蓋為之左券矣

贈見山陳先生八十序

內弟徐仲子間過不佞譚見山陳先生壽且徵之言
蓋娓娓乎其道之也始先生起家賢科為銅陵令歸

歸蓋二十年而鄉人以杖薦又十年而為今之日則
先生生四百有八十甲子矣先生居橫山社縣車以
耒希復游城郭曰此不腆先人之林宅非耶柯轂出
泉石間饁者負耒者錯而相勞吾樂故在耳微是何
以鼃莫佚吾杖履田父林叟時而語歲無恙時而語
桑梓無恙先生倚杖而聽意殊得也二大夫子讀先
生書且好修諸孫且彬彬立矣歲時上壽先生頽而
色喜曰而翁幸以先人林宅老且不有先人度藉耶
則而輩在幸毋墮吾家轂也已先生蓋虞世家諸父

當弘治間二為進士曰將樂公僉憲公一為鄉進士
獨先生父以隱德稱廼領有先生而先生壽軼諸父
蓋遠甚先生則洵卑厚哉矧也其未有涯也陳季子
曰不佞慵未能窺先生業聞諸某矣某內子先生女
子子也以故其言媿媿如此夫古之効所愛願於尊
親寧不亦惓惓竭摯而未覩所謂文者母亦曰啓口
而祝存爾耶且壽先生自有之不佞言烏足以當先
生乃謂某第往而効其所愛願即啓口皆祝不啻若
媿媿者語祝既第為不佞致區區曰壽先生自有

之先生第強食自愛嘉與田父林叟夷猶於無涯之
歲而坐觀子若孫日次第以家聲起不佞末所效一
言矣

壽大司馬見海翁公八十序

始余守章句識翁公長安即知公燁然為方岳大夫
矣越十年余釋褐司寇即去公為即時二紀而遙然
署中徃徃慕稱之而公蓋游歷中丞晚晉南司馬贊
機務云公閒居里第余亦中廢益習公迄為姻家公
嘗過余見耒耜夾門咲曰力耕未必居贏然而樂矣

一日余謁公偕之壽藏遊焉佳木布若列眉余謂公
樂哉丘也頤安所受種樹經亡其用經世緒策換耶
相眠而咲已余有小事之役每飯意未嘗不在田間
若林麓云無何余乞身歸病謝客亦未克脩謁第傳
相勞也公女故字章兒終然命之曰甥時時悉公起
居狀丙申之歲公春秋八十高矣無論健飯即以文
請者操尺而應娓娓不加點其神王如此余惟古之
士自幼肄簡諒至四十始仕五十始服官政七十致
事夫其需之而仕也非虞其不達於政耶年及而致

其事非虞老耶公弱冠成進士出而明刑出而陳臬
廣勵學官言儲則儲言兵則兵言河渠則河渠外之
節鉞內之舉鎬京而委重焉其筮仕若老其老而治
辦若強且公偶得遂縣車耳假而今日猶杖於朝深
謀遠猶將無楚丘所諄始壯者而寧直不耄也世云
春葩先萎或又謂天輕與人富貴而重與人樂如
公豈不稱蚤譽哉迺更難老都高位食廩祿矣而悠
然有以自適則所取諸天者洵弘侈已公嶽降之辰
春和襲人鼓鍾衍衍翩翩子若孫奉觴上壽祝殷殷

於庭公顧之懽甚不惟燕樂之以尤樂夫班祝而樂
舞者畫琳琅也是日也兒章告往祝余不佞為叙公
壽大指授章持獻因寄訊公鄉耒佳木屬者孫枝樛
如作何許狀他日與公壽並窳蒼蒼千尺倘余病幸
間哉耒耜之賤尚當操杖履以從

贈任王母錢太孺人九十序

任長卿既繇司理量移刺許捧檄過里門其年蓋王
母錢夫人九十壽也檄故有程然長卿昵昵顧前驅
勿亟念庭闈獨王母在適有天幸幸歸不及時奉頌

史驩者奚取食貽穀稱人孫為廼開堂張樂率家人子弟跽三祝而觴太夫人稱百年壽客聞之津津羨也為太夫人壽也者則往為長卿壽太夫人也者則往款款肅肅充庭矣陳有年曰往壬戌不佞從南宮籍後邑六人惟長卿上逮王母云而六人中楊懋成者故與長卿同計偕則言乙卯之歲以王母及見孫舉邑厘厘長卿家無兩也於難矣難矣今去乙卯填幾一周天即壬戌亦已七閏而大夫人歸然近上壽壽且不衰斯不以益難乎哉不佞嘗讀令伯表多其苦

心至所稱舅奪母志與乳乳獨立又未嘗不廢書嘆也人生至是無論令伯病邁乃劉九十六年之間何閔閔哉多虞也長卿蚤所邁壹似令伯母潘夫人獨矢不可奪之志枯樛樹長卿若季躬睹長卿貴有嚴而後下報贈公曰庶不以虞太夫人間者有司擊其事上諸朝旌如今太夫人聞之而後慰可知也且太夫人未中年而撫孤孫今孤孫有孫矣長卿即仕在外太夫人且曰而身已屬官家無以我餘年為念餘子是任也太夫人居頃之壽且邁劉若乃所遇其不

可同年語明甚然不佞猶竊有顧世孰不謂令伯孝者即日夜不解帶而侍猶之手疏節也獨其精潛悃積近能諭諸僭辟遠能使人讀其表竦然泚而興孝且使百代知有令伯王母此之為劉壽不直竟九十六年止者茲長卿之遇可無事表矣孝子入則虔養出則脩豎長卿曩為直指使偶有所中稍左復起誠有意勸宣明德而壽王母以榮名矣乎來茲之聞寧獨令伯壬戌時長卿與不佞甫逾壯耳古人有言三十之年忽焉已至不佞固陋悞墮先人教願長壽

王母之見圖不辱也時長卿同年子若而人諸雅善
長卿者若而人集而拜太夫人于堂懋成目不佞為
叙次如此夫太夫人壽日益長卿脩堅亦日益不佞
將執簡誨之矣

贈夏王母孺人八十序

人生自成童以至壯有子有子矣又及其三厥亦幸
已矧又及孫立立矧賢翱翔天達都榮展采斯其幸
千百中不一再邁也惟君子翱翔天達有祿迨父母
養已融融然言樂矧更上迨祖父若母若母在父母

尚不稱老足侍也身得畢力効職事即四牡驅馳可
無遑廻望闕者庸稱遂祖父母父母志斯其幸亦千
百中不一再遘也歲之丁卯邑夏太母蓋年八十壽
云而母有孫曰夏子官司寇卽先一歲啣命恤粵南
過家預上壽云養吾周子姻家也以詫其同年陳子
陳子者亦與夏子游同曹雅甚因相與動色羨焉陳
子曰余觀家之將興不直其祖訓篤也蓋亦有內則
云然婦德不踰閭陰教不專成何用觀教眡厥貽何用
觀德眡厥享良可覩已昔馬遷纂史記爲巴婦作傳

彼固謂其殖一家耳夫殖貸之於殖賢詎啻千里哉夏
母蓋二子余未及見季若川君而獲見其伯子浚川
君君長者也司寇郎又蚤歲奮跡綽有休聞母悅而
樂焉較所殖孰與巴婦多曩司寇郎在署也明習令
甲善平反頃歸誦所事且告將之粵南布

天子德意毋俾辜人含抑母唯唯勞遣之往無煩戒
其心則其所以教之者素具也庶幾哉此可以觀母
已或問夏母壽當何似陳子曰未可涯也余嘗見崇
山之曲古栢巨楠蔭然若阿鬱然若盤蒼幹直出孫

枝敷茂含滋藉和還輸其報是以枝日益榮幹日益固何者其取精於天地厚也夏母固洵壽且輸之者厚矣容可涯哉母三月先望一日降姻家相率往祝諸堂養吾子會有憂不為禮聞陳子言屬筆載諸簡將用以祝乃不辭書之書之日母壽之日也

贈盧恭人六秩序

盧恭人者連城盧公夫人也歲丁卯年六十夫人誕辰寔六月會子太學生將試京闈計其日不獲歸上壽先期三月稱觴焉觴之日蓋公誕日云公恭人章服命

冠堂上坐三子者肅而前偕諸婦孫子羅拜堂下起
次第祝且觴公恭人頌之愉有壽色美哉穰穰乎稱
齊福矣始公起家進士為循令晉比部為才大夫三
守名郡為良二千石在在率章章著殷猷恭人式克
相之用能寵拜綸褒附以令聞既而公陟都運奉

命得致其事歸公文章政術舉足絕人廼日優游定
里間召父老知故樂竟日忘倦宴如也恭人察公雅
樂內總家政外饋視賓好無一不當公欲者然性敏
勤篤未嘗作貴人態女紅瑣細時親執之至于今猶

然夫禮稱六十指使言安老也恭人既當斯之年貴
有名號長子婦饒減獲顧強力爾爾此非其得之天
者然耶恭人毓伯叔二子皆太學生積藝韞郁少選
矯矯青雲矣側毓季子幼而穎恭人撫之未嘗幾微
二子間也彼詩所云小星樛木之風何以加焉予嘗
侍公教且雅交伯子而同年周子者其先大夫與公
為姻家又數數為余道之以故得聞其詳如此余曩
讀史見敬姜訓子楚姬告君以為彼固閨閣者流耳
而其旨於政道有足發焉者不自知為之三復也然

而俛仰今昔尤不能無重感者夫開國承家類世所謂英豪人也又類自其身創累尺寸曾無幾何往往志盈欲侈還視疇昔艱難習霍忘之此其故失不特也至如天下事非一人所顯成人誰不知者一旦當階據器顧蔽塞賢路不與立或偵形景相傾則媚者之情大都可覩已故余每聞恭人行輒肅起感嘆不能已已蓋誠見其德之不易云夫世固有無德而倖福者可以艷俗人之目而不可以齒君子之論若恭人者其允哉不為倖矣周子以恭人壽將持祝往

過余謀所為祝余不佞取所聞周子者次復之而重
感嘆之說觀斯言者得無有同余感者乎

贈廬恭人七十序

往廬夫人六十也夫人姻家曰周子輒有味乎不佞
之言而載簡牘為夫人壽迨茲今十年所矣夫人偕
亞中公壽稱尊穀履彌昌周子時有事淮楚馳命乎
某扣余扉曰請所為申祝者余不佞即往日言悞不
是以當夫人而款啓於亞中公之側且夙所聞周子
夫人諸內懿可徵述業僂指頌之語在往牘中何贅

也某持其大人語請不釋余未有以應也而客在
緩頰問壽期某曰六月也六月則以茲今稱祝何也
亞中公降日也公家子姓上公壽遂壽夫人客賀者
纚纚畢集也公齊耄乎曰四年以長客因頌余言壽
夫人以公降日禮子曰義起也烏乎取取諸易夫易
陽唱而陰隨夫人不自壽而從公若曰發祥者公也
以是為公唱之也公生於十二子為辰陽也物始娠
也夫人生未陰也物成而可味也天若命之矣易坤
道無成則何以言成非無成也亦自成也亦自成是

以從公於壽以是為公唱之也壽可唱而得乎易震
與為恒動而順唱隨之象也恒壽道也天地非順則
將寒暑非順則窮家國非順則僭百體非順則跖
蹻非順則為攸壽壽夫人以公降日則是以盡順乎非
然也夫人可謂順以終始者也始亞中公挾才美而
起游刃中外幾三寸襁見勞譖驟轂敵晚而善刃於
井邑遺其榮名而神日益王凡夫人所出入贊公無
之而不為順已惟順故壽壽且昌當是時躬有珠翟
堂有孫曾揆具薦卮筐篚旅進行以鍾鼓夫人即太

然而顯尊其成似不為踰越猶然不自壽而從公故
曰順以終始也何以明其然也亞中公以易起家深
於易者也深於易是以庭閣之間相視而志喻也客
輟然曰頃子之辭也吾以子為腐毫而無以磨也乃
今立譚而道存多矣哉子之文矣嘻有是哉不佞直
臆譚耳何敢言道雖然客寔慕余請遂從客之言

贈朱母周孺人六十序

夫俗之厚則必自嫺族矣衍葦具適終之曰以祈黃
耆黃耆可要乎哉然而惴惴祈之蓋其厚也古之君

子緣情而交載之以禮叔世易之以脩容故其平居
相視秦愉越卹若不相及然抑或厝權石於姬姜管
蒯之間而輕重布之也洵如是即使習為儀而工言
祝又何以稱焉余比家居有族子子然而孤食業於
四方間歸必謁余謁必言朱子朱子者族子姊氏夫
也其言曰姪露卑不自植賴姊氏夫不啻蒯我從而
噢咻我伙我振我斲以植我微獨姊氏夫也即姊氏
姑猶然族子顓顓恹恹人也無溢言而朱氏子亦歲
時余見見未嘗不言族子也其言脫脫眷眷無屬情

昔晏平仲相齊而父之族無不乘車者余祿不遠乎
仲然對朱氏子輒脉脉愧矣茲歲之秋族子手一軸
直不當三銖噉嚙語欲有所請余曰何哉爾操者曰
是將以壽吾朱母也母蓋耆年戚屬胥介幣祝姪聞
諸叔父貧者不以貨財為禮然如姪者祝固當先敢
丐叔父一言得藉手而稱壽余領之謂小子爾無以
為不縛於儀者乎則嘆者乎夫禮之載情雖菲厚也
苟其不情雖加崇飾焉涼也余非工壽人者然朱也
厚爾也知以情為厚余即言不為謾且也踊貴片詞

齊廷弛刑式蛙區區而壯士撫劍余言稱名也細儻
亦有踊蛙之意乎當是時會余有昏子之務未及言
而族子亦他往歲且晚始脩前諾授數語顧持管者書之
朱虞名族於余宗為世姻族子曰母出周氏相朱隱
君以善稱於鄉姊氏夫雖邑從事乎制行馴謹非刀
筆者流也

贈陳母王孺人七十序

漢子平氏云富不如貧貴不如賤彼固岩處奇士語
耳箕疇衍五福首言壽繼之以富然必曰攸好德夫

福非德奚歛壽與富殊嚮而同出者也史遷傳貨殖
羞言貧賤君子少之至其言君子富好行其德良亦
近焉後之以貲自雄者不仰有攬而俯有藉明明務
積著見謂得意而不復知有仁義之澤其裔世席貲
而食侈聞人譚禮樂稱先王則惟恐卧對學士先生
且憫然流視焉此何以故哉於其無好德而乾沒於
富其勢固然抑其家庭內外之間亦無有能後先以
德者耶夫如是彼其言不如者亦有激而云爾也陳
子間以其言言周子周子曰是則然矣子知余娣娣

陳履甫子曰然知其父持齋公乎曰然夫陳虞世族
所稱簪纓鼎食者也持齋伯季並以文章事業有聲
御史臺若尚書郎而持齋獨用素封隱然公雖隱於
素封乎不與諸富人比雍容賢士大夫間以好禮聞
性尤樂施徃徃破券市義或歲侵輒發積賑饑者遠
近走若歸皆拜施誦義而去當是時持齋公之名傾
一邑履甫承之先世長厚之風依然也然齒胄學折
節事詩書遊學士先生多器之者行且武其諸父蒸
蒸起若而人可與皋皋乾沒者語哉陳子曰善矣爨

余家食蓋數聞持齋公義云而此又時得見履甫遂
遂然退讓君子也且嫻於文詞意所謂好德者也今
於子之言益徵矣居無何周子過而言陳母王孺人
者七十壽也請以子之言為壽陳子曰斯非持齋公
之配履甫之母乎信賢是壽也夫婦服也輔也言能
服其夫義而相輔以令穀也母慕也模也言子慕其
慈油油然就而模之也今觀持齋父子即孺人可知
矣夫壽與富殊嚮而同出者也故曰是壽也孺人之
壽在乙亥歲仲冬十有九日當其日周子書陳子言

以往

賀少傅渠翁呂相公八十序

少傅呂公歸自相垣二十有三年而為萬曆癸未春
秋八十高矣 天子命撫浙重臣若直指使閭皇祖
舊輔無恙錫餼羊尊酒有司月致粢歲致役用為常
公肅起北面稱主臣拜手稽首后矣老臣寔耄大懼
莫能報塞為不顯休命辱拜手稽首后矣蓋竭慶而
觀聽者傾遠邇詫以為異數云先是元配夏夫人者
於公儷壽也鄉國大夫士業駢祝而進諸堂纚纚焉

至以迨公覽揆之辰則天子之寵靈寔式臨之愈
謂世有元老則世重繇天子作之則世益重於是更
旅進交賀而年宗人子有從姍家後者謂年宜有文
年不佞焉與知文且也為德業壽也者纒纒不勝言
也為慶澤壽也者纒纒不勝言也不佞焉與知文雖
然雅聞教於公矣公生平不沾沾自憙尤不誇言功
間不佞得承閒燕公為言結髮受尚書至臣無作福
作威云者未嘗不竦意惧也已起家史氏覽往記良
衰之跡恭之國故實厥睹聞與箕疇若券焉身微

肅皇帝恩侍密勿逾紀矢不敢幾微有所介特而播
越惟辟之威福以渝風心蓋不佞輒見語輒及之不
一也退竊惟公之榮問鴻業何所不可述而惓惓斯
語噫淵哉念乎夫威福之下移而衡決自古有然矣
大都九重穆穆驚然謂天下事靡不由已則移不然
而傾上意所嚮從與入之因賈寵而示天下權則又
移不然而當宁察若神霆百司廩廩救過不給已因
挾其幸以與廩廩者市則又移不然而乘冲濬之譏
讓方歛聽戢銳而寄之柄也已因偃然私太阿而亡

所忌則又移小移小決大移大決於是乎威溢福溢
鼓側頗僭忒者風聲數毀皇極而其究也威亦還中
其身遺世大鑒不佞請無舉遐博試舉近事繫於公
章章者始公在廷屬大臣以才幸而專慨然曰禮樂
征伐不當自天子出耶隨舉以試畿內士 肅皇帝避
之駸駸柄用公矣比相檢幸用事最稔者據公右公
所為曲柔其悍而陰維其萬一若不得已而耦俱也
者意怒如也既而用讀禮歸歸良久匪人為政最後
而朝野側目重足囂然不堪生公雖優繇里居然而

意念深矣自今觀之曩其人成若敗不歷歷可睹哉
公壹意終始不以威意自詭而至於今天子迄錫
之福不衰詩曰畏天之威于時保之又曰永言配命
自求多福夫知畏斯知配命矣福焉不永將百年食
天子之賜未渠央也或謂公蚤叅政為德未究茲即
大耋非公家尚父應卜歲乎有如 天子問而得公
無恙狀以蒲輪召公公宜不得以耄辭夫君子之在
天下有以用重者有以不用重者熙載論道庸勛相
我國家此以用重者也葆和繫安而隆然為寓內元

氣此以不用重者也今 天子赫新皇極鼎臣祇若
威福而提衡布之小大之吏爭被灑而奉職公冢孫
適以時成進士公將愉快於世道之昌而又幸後之
人無虞於側頗也第于子衍衍百年食 天子之賜
而居重于寓內即所稱報塞以無辱休命者意在斯
乎不佞則烏與知文烏

贈徐大母鍾太孺人八十序

世所稱祺祥可頌孰不先高年哉高年矣耄期偕老
十不獲一高年矣而偕老矣恬愉叅會百不獲一何

以故得天有厚薄取數有簡全語歛福若斯之難也而譚者動稱木公金母瑤池貝闕以為奇或言赤松遐舉厥有僊偶云其旨繆悠無實儒者所不道陳有年曰余徵高士傳若林顗榮啓期諸叟槁立鯁遊雖壽矣尚矣龐鹿門夫婦義至高也獨不詳天年所底且畢其身隱約叔世乃今於妻大父母竦然詫焉母大耋人也翁視母屋一歲差矧同然噉也愉愉然樂也怪乎其似道也則所謂百一者也初翁治博士家言未弱冠輒高視一邑邑同業無敢鼓行先者僉謂

翁一第直發蒙取耳已竟用諸生久次始薦公車例
則授博士翁雅不急仕居少選還書言吾不能越渫
元神坐五斗陸沉碩人洵同志耶轅其無北母報曰
吾嘗為夫子決策吾業為隱居之服待夫子矣遂不
往翁知母之不往也則大喜謝歸歸下車相見舍然
而笑堂壺之間徐徐于于茹和葆真用迄于長年夫
古稱不謀妻子者謂其人非也誠其人非也彼且旦
歸而夕許懷寥廓而艷芬華何恬之與有繇翁若母
槩之豈特千里哉翁家古虞隩區聚族而居無慮數

千禧章縫纚纚稱蔚茂至推內行篤摯必首言翁翁
性方嚴無他好邑廬終數歲不識杖履里中豪舉若
夸毗者不敢過而望也所程督子姓有石中涓風母
寔左右成厥教子姓咸廩廩質有其孝弟焉脩翁業
而繹之日以滋大今濟濟侍者丈夫子三人女子二
人內外諸孫曾且五十人壽之日昃爽衣冠列阼序
旅進班祝雍容甚都而長君令尹氏方仕楚則拜使
馳上壽翁若母進使者問治狀喜動顏色乃睠在列
舉餘醕休嘉膺嚮愉快哉可知也余小子受室令尹

氏班在諸孫行為內賓爰載簡叙其事叙曰翁南州高士之世學者稱南石先生母出鍾氏質行具若右簡說者謂壽隆又未可涯量盖以其素卜之也余小子亦云

贈楊淑人六十序

完愚楊子者之於余也盖友壻云已又同進士又同僦長安舍居朝夕語懽甚以故聞邵淑人賢邵淑人賢願羸恒疾完愚子語輒賢淑人然亦輒隱虞之也迺余則笑謂完愚子有隱憂耶夫天下壽者豈必強力壽者而

必強力孟賁烏獲將無至今存耶相與啞然而罷後
完愚子有事四方余林棲者十八間一見未嘗不理
曩語問淑人無恙也萬曆癸未之歲淑人則六十壽
矣完愚子有姁家周君過余曰完愚子固好君言也
請所為侑祝者余謝不敏坐久之而周君緩頰譚岐
黃家言漫及黃白冲舉之術余亦漫聽者久之卒而
咲謂周君言則洵玄矣悠哉余第徵其近者夫邵淑
人方壯也而虞疾今稱耆壽矣不益之衰君知其解
不曰不知也君知完愚子起家歷二十年奉入無他

羸迨歸而蕭然不能詒諸子爨室且日廩廩慮詘
乎曰然然則淑人之壽可知已今夫爇巨燎者膏而
風諸衡達燔橐薪而附之不須更燼若煬一釭劑以
龍膏之莖承之以盪沃寒泉焉寘諸奧宇竟夕不熄
人之生亦猶是也凡生不能無欲求所欲不能無外
注而中搖是故得者惱焉失者躁焉其惱也幾不知
有生其躁也幾不知有生俛得俛失迺謂膏火蘄謂
厚生而不知日自煎以趨於燼此在流俗中智以降
所不能縣解也而又奚論於閨閣嘗試觀世之仕以

賂成者豈獨其人咎哉錦襦瑜璆耽耽辭署中不左
探筭而右計錙銖退食亟從臾之從臾之不得則交
謫之間不者或曰有厚祿以為之前茅云爾比歸則
滋甚矣倒囊而出所藏覲以為兒女子豪小詘小志
大詘大志或艷他氏之張皇而熬然熱中倍交謫而
莫之極迄衰老不悟此其人何限哉藉令淑人有一
於此自完愚子為尚書郎為二千石晉而為副臬為
叅藩又晉而為廉察使固日從也何以無他羸浸假
而不無他羸何以歸而蕭然不能詒諸子饜室且日

廩廩慮拙也又不然而完愚子信賢能自潔淑人何
以無熬然熱中浸假而不無熱中何以能持其方壯
虞疾之躬稱耆壽不益之衰也余故曰淑人之壽可
知已奚必訪岐黃需黃白豉冲舉然後長年哉周君
竦然曰旨哉乎君子之言且也完愚子固好君言也
請遂以是侑祝夫完愚子非果好余言也以好余故
并好余言則或然矣廼次而歸諸周君且謂君第往
余且俟客間訪完愚子復理曩語相與一啞然也淑
人出甲族拜 天子寵章多賢子姓人能言之不具

列

贈南石徐大翁八十序

前茲今一歲余小子蓋津津載藺誦連歲壽矣迺
今復壽大父懿鑠哉大耋良不易也而矧偕也恬愉
會也語在前藺云當是時外舅長君者官攸署其冬
用計吏上京師大父壽之歲竣計事馳歸太平山中
奉翁母於庭拜且請曰不肖其徇祿湖南即大人百
壽末能身稱觴効大人前無論夙夜茲幸得間瞻膝
下雖不獲與初辰者會乎願及某之弛於負擔也敬

薦一卮於是張樂高會諸父姍舊外內畢列酒半翁
進長君言曰子今幸老人無恙亟為壽耶吾且有訊
於子子結髮誦詩三百乃今得一當司牧何以使元
元閭閻稱民父母且屬者旅進述職持何狀獻也子
誠使元元閭閻持最狀獻此之為老人壽武弘多矣
不者浸假而輟夢澤以為尊羞衡嶽以為俎吾嘆嘆
弗珍焉長君則前對曰某何敢以大丞所幸教之身
媮無所事尺寸為大人恩始某蒞政痛閭閻短絀不相
得輒不難委命鈎吻為信信地盡力牖之間不悛又摘

見其情重慰之俗稍稍去矣什一說錯擊輿人之謀
曰履畝方之便會旁邑坐方田為不利者所齟齬即
當踳憂以為憂憂難圖也頃之攸田迄就理無廢畝
無虛筭云夫鈎鉅見神拆筭示嚴則其何能柔獨謂
令於民為父母既父母之而忍棄疾之哉洎其在事
而社有倉里有塾也四封之利敗有問也元元幸未
我離逖持以獻明堂幸不我瑕殄則可謂云爾也矣
長君輒言翁輒適然首肯容盡起操庖為壽曰幸哉
有子如此幸哉有子如此一坐驩甚已而翁督長君

行長君昵昵若不能別者翁謂長君行矣 天子授
之民矣且攸不有旒倪跂而譏父母者乎而後之也
老人強飯子有仲若季若諸子姓群然而侍豈伊異
人哉子行矣長君承命猶昵昵若不得已也者而後
就道就道以往訊旬至使月至徃復而傳起居者趾
相錯也蓋八閱朔而至于涂月先望二日為翁初辰
仲君季君率家人脩祝事余小子廼稱曰翁始脫綈
謝博士睹者若謂顓情澹泊入于寥天及所程長君
治狀至念旒倪跂譏之祇役一何具也不如是何

以為有道矣余惟有道者大都屢躬龐然取諸天歟
然而後躬及家林林焉食其澤雖然林林焉食之不
一埤之則澤雖厚有時而涸今觀長君治狀歷歷哉
埤一籌矣且詎知仲君季君不將提衡而埤之也又
詎知諸子若姓不相與接武而益埤之也斯翁所謂
壽弘侈者也余小子從內嬖之末獨固陋未有以埤
萬分一而僅僅壽之以言故不敢舉世所赫翕動色
者為翁家頤之而稱所為埤翁澤者夫稱所為埤翁
澤者而實固陋未有以埤也則慄慄魂矣